

**Circolo
S.O.M.S**

**Comune di
Castelletto M.to**



BUSINA **'d CASTLÈT** **dei 1997**

Domenica 9 Febbraio 1997
Piazza Astori



BUSINA' dei 1997

Cap. 1 "A s'anviaromma"

Veg

O me car amis e a titti ist bel madamin
av salutomma ticc cun in grand inchin
per ringrasiav d'eisi an s'ista piasa,
nui a somma û sep d'na bonna rasa;
sija per û dialet che per al tradision
an t'ani a seicomma ogni ucasion
per teni a gala la nostra storia
per ticc û dev ejsi na rason ad gloria!

Fiò

Nui a seicomma ad stav après
ma cun la schisa dai prugrès
iss masnà am uardu cui mur stòrt
u smija quasi caj fasu in tórt;
ma auomma nent rubai l'alegrija
a seicomma ad fai riji cmè-si-sija
e per truvàs turna an s'ist palchèt
as-somma tenc ai mur fin cun ai blèt.

Fija

ista festa l'è facia per divertis
uardomma allura ad schivià i murtis
se as feimomma a restomma beja ambalà
e per arpias ambogna spianà tit agl'aruanà;
a l'è u ters ani per ist baldachin
as tnomma listri cmé in caudrin
peichè ajomma tant listorji da chintàv
se ben tanc afari i son restà sut ciàv.

Giuvnot

vui a fej semp trop la presiûsa
ma a sij pitost cariaja ad sgaîûsa
a vòri semp avej ai mas an man
e per al primissji drubà ai bataclan;
per teni sut cuntrol i quater cantòn
a lasei amli u risot cmè in pulentòn
cmè schisa a tiri ad -mes l'avsinna
pò,per digeri am pasei ammà na papinna.



*Me car fanciot fej na sunada
e per Carvà bugei magari na lambada!*

Cap. 2 "Al noster rejs"

Veg

Per nui che ajomma za na certa età
senza che u sija ai cas ad ciamav pietà
ai sciòd ad svens certi malincuniji
cu smija quasi ch'jabiu dal maniji;
a l'omma cun ai caset di noster ricord
ma i pi tanc i riposu an s'culla culinna au nord
as seica ad svens quaic riferiment
ma nent semp tut am turna an ment.

Giuvnot

U smija quasi c'am digghi dal verità
anchesi mi ogni tant a bat dal sicutà
cul che amma l'atrerì ai davu nin valur
ades as seica ad custudil cun tant amur;
fin la piasa as presenta pì sulitaria
u smija quasi chi sija pasà la malaria
i noster vegg i son quasi ticc spari
e icc scalin i son armas beja sguarni.

Fija

mi a l'ò semp sustni e dice
che a sareisu armasi au sicc
al racumandasion ad parlà u dialèt
a j'omma sustinji dan s'ist palchèt;
ambogna cuncentrà ticc i noster sfors
e ac fanciot mitaj quasi ai mors,
l'è cmè la cicogna che d'invern la vola vija
pò la turna au ni, an-uand clè nasija.

Fiò

l'è quasi ura ca fasu dal pruposti
cun calma e senza dà dal batosti,
a faromma savej ai noster minister
che i dialet i devu armani semp lister;
anveci che a l'asilu ai mustru l'ingleis
ai faromma amparà al paroli dal noster rejs
e se i mancarrà di bon profesur
i noster veg e a gratis as faran unur.



*Fanciot cantej na canson dai Munfrà
u dialet a l'è ancora u rè dai Carvà!!!*

CON LA CRESCITA
ZERO, IL PAESE
INVECCHIA.

TRA UN PÒ AVREMO
UN PENSIONATO
A CARICO DI OGNI
DISOCCUPATO.



Cap. 3 "Anvijbi e ufeis"

Veg

Anchesi ist'ani a jomma spicià i Re Magi
ma as vegh che anchesi lur ajavu poc curagi
u tascapan a l'era algèr e pin ad cucali
acsi ajomma rinuncià ad biscajà dal faiuali;
per n'atr'ani a m'an prumis in pachet ad liri-Euro
ma a sper che primma am ricoveru nent an neuro
peichè cun amma pè e os avgomma na britta fin
l'è in suplissi nanc tucà a la vacca du Rancin;
a sarò fursà andà turna a rapulà di gigu
a spicianda la cuntingensa e a speranda c'as visu.

Fiò

Ognidin l'è ormai 40 milion ad debit
am tucarrà vendi la cà per quasà is deficit
dop tanti cunquisti a riturnomma a la preistoria
e a Rumma ai mandarromma al midaji a la
memoria
pò a piantarromma in casinot cun ù tec ad paja
acsi aimenu a pagarromma nanc pì la taja
e primma che ai federalismo u sija amli mejer
a cert- element ai faromma anchesi j'ogg nejer,
a somma propi stuf ad fas lacià
a cert mariolu ai mandarromma di tutin da cicià.

Fija

antant, vist che ormai i son stac squasà
ai tangentista ai-ju daran na spasà
cun dui sold as faran sistemà la pagela
e j'unest j'armarran semp pin ad crivela;
per cul referendum e al sò prescrision
as nu son fregà senza tanti preocupasion
i parti i ciaparran turna di bej miliard
aju fan scuri cmè j'umet an sai biliard,
i son propi specialisà an tu zov dal tre carti
l'às a l'an za an man primma che ai mas tlu scarti.

SPUTA NEL PIATTO
DOVE MANGIA?

SÌ. TANTO
È VUOTO,
COME AL SOLITO.



Giuvnot

Ticc i di ai-nu sciòd jinna nòva
a quaicadin ai mancarrà quaica ròva
da nascundon a jan decis e cunsenti
di bei stipendi per criminal e mafius penti
ades ai spuntarrà anchesi n'ater sindacà
peichè icc bandi i siju pi tutelà
ai pretendarran anchesi la cuntingensa
ajomma propi in guvern senza na spliua ad cuscienza
e antant per tit cul uiduvi e mari
ai dan dui sold per sbarcà u lunari.



*Cun la speransa ad spasà is tlari
piej na sunada dan s'cul silabari.*

Cap. 4 "Sconter fra generasion"

Veg

Nui a seicomma semp ad scrôbi
e se ben a somma caria ad gôbi
a uardomma ad trovà na bonna smens
peichè la mural l'è sparija ad svens;
la cusciensa a l'è nent na sciensa
ticc ai n'omma a suficiensa,
as trata amma d'aplicà quaica regula
e nent semp dai la cuipa a na tegula;
ambogna savei acetà anchesi la sfurtinna
i periccul am seguû za da la chinna.

Fiò

Ma sa ca pudomma mai pretendi
a j'è semp u rischiû quasi d'ufendi,
cun masnà e fanciot an gir di e nôc
a rivanda al medji i son za beja côc;
quasi abandonà dal famiji cmè di can
a pretendi amma e spiuà an saj pan,
i voru fà la vitta da galèt e dritu
cun dla cunision cle var menu che in pitu;
lavù fat-an-là c'al porta fadija
ma tant cuipi as trovu pitost an famija.

Giuvnot

Mi a son stacc alvà cun la cureja
a j'ò amparà a filà lisciu cmè an sla seja
e se ogni tant as ciapavu quaich lurdòn
poc per vota a jè bità la cunision;
a pretendomma nent d'eisi di sant
assomma andrisà a fanda ai vignulant
pô an fabbrica per amparà in amsté
cun braji arciapataji e suclon an ti pé,
cmè spaider a j'avu na grama bicicletta
e jomma mai arfidà ad purtà la caretta.

Fija

I disu che la cuipa a l'è dai prugrès
ma mi aj vag nent trop après,
a vegghi cert element gasà e antrunà
chi criju e i sgoigû per fas nutà
e nanc avej rispet per la bajunetta d'is suldà
ufendi la memoria ad cui che an uera as son sacrificà;
strà e piasì pinni ad butiglietti e armenta
cun ticc ic ghin a jè d'armani sgumenta
a l'andrisa scaudai agl'aureggi cun in svarslot
e picà sèc senza poua ad fai in tòrt.



*E speranda d'anciudà icc gaiòt
Fej na sunada, senza drubà u silòt!*



Cap. 5 "A cuntemplanda la finansiarja"

Veg

La crivela a la sciaromma semp pi avsin
a somma quasi ticc splà cmè San Quintin
tit al stmanni i sponta n'atra manovra
a somma quasi strangulà cmè da na piovrà;
tasi, imposti e n'ater gir ad finansiarja
c'at pasu nanc pi ai chinin per la malaria,
at dan d'antendi chi fan anchesi di taj
ma certi prumissi i spissu tant cme l'aj
i sò risparmi a jomma mai pudi vegghij
e al ciapi a somma pi anuanda mettij.

Fiò

Nui la sgajusa a l'omma nent sperimentaja
ma tnomma reid e strensomma i denc cme na tnaja
a s'eru permiti ad pias quaica vissi
ma am pias nent c'am fasu al ciapi nissi;
a somma quasi stuf ad fas pià an gir
se ben a lauomma cmè di cavà da tir
e quand sdernà a rivomma a la fin dai meis
auomma che la tara a l'abia u giust peis.

Fija

A t'la dan d'antendi cun in bel suris
e al tò spali i saguittu a divertis,
at chintu che ad'man a saromma turna rich
e at lu spiegù con furmulì e di bej alambich
per fat credi che la presion l'è nent tropa
ma cl'è l'ultim sacrifici per entrà an Europa;
mi am cuntentarreisa d'andà ammà an Svisera
a voi nent snià an t'ista frugifera!

Giuvnot

a forsa ad siringam cun di clisteri
as sent amprimma cantà di misereri,
stòmi e fiddich i patissu la sicinna
ai minister at pasa amprimma sa medicinna

se pô at rivi an temp per na grama pension
at dan na balansa ai post dla liquidasion.

Veg

acsi al matinni at uardi ad nent superà la dieta
a l'era da immaginasli senza eisi in profeta
che dop quaica meis d'uspidal e gran durur
at portu an s'cul bric a cuntemplà u Signur
e spedi dan sai purton quasi cmè in pac postal
e ognidin ca s'arangia per l'ultima vota cmè salusal.



*E a seicanda ad nent sagrinàs
fei na bela sunada ca posu arpiàs!*



Cap. 6

"Ad quaica nuvità dai Pais"

Veg

A jò di fastiddi a drobi u libber
aj n'ò cundiji cun l'amé e cun ai bitter
ma per nent piantà dal quistion
am tucarrà ad fà dal limitasion;
lasomma stà rapinni e brigantagi
restomma amma an ti nost paragi
a semarromma culilà ca jan lasà na tracia
lasomma andrera culli da uacia-uacia.

Fiò

gesà che a somma an s'ista piasa
u smija che la Sucieta la voja crobi la trasa
cminspiei allura a rancà quaic Caravaggio
c'as posa superà in gran miraggio;
ma primma ambogna eliminà tit culla fim
sidnò ai catar am porta ticc a la fin;
ades che i son stacc spianà ticc i debit
spiciomma nent ad vivi an si redit
anchesi i giuven i vòru pias dj' impègn
a spiciomma in cen e cu sija in bon sègn.

Fija

uardej ad drubà anchesi sa piasètta
l'è in daimagi fai cressi la téppa,
l'an pasà a jan sfulunà fin la meila
ispiREV allura a na bonna steila;
fin na Principessa là fac i compliment
a pasanda per andà a cul gran riceviment
ticc i giurnal a jan parlà du noster pais
anchesi per ai Cumin nôv l'è stacc in tris;
cun la piasa pinna ad gent e persunalità
Castlét per u 2000 ù sarà ben acredità.

Giuvnot

anchesi la gesia ad San Roc l'ha cambià aspèt
l'istà pasà a l'omma vista cun in'ater efèt,

per icc archét piantà per salvà i pedòn
a j'è stacc fac quasi na rivolusion;
se certi sicchi i rampiju si dal miraji
per i mil aj'è dj'anè per agliaji
i son là, a sutta ai porti ad Baigòns
cun ater suplissi anchesi per i sbròns.

Veg

spiciomma ancasi l'ufissi postal an piasa
c'as posa pi rischià d'eisi sputli cmè na buasa,
speromma ancora che is parchegi as posa ardubià
sidnò a titti ist machini ambogna dai n'arsià;
tanti lampadinni an gir i son staci missi
per n'atr'ani a spiciomma d'amsirà al prumissi
da l'insimma avji nent gena ad prugramà
nui a jomma ai compit ad cuntrulà e reclamà.



*Se icc strument i son nent trop camulà
fei na sunada, aj Carvà l'è ancora alvà!*

QUESTE SONO LE ULTIME
NOTIZIE. DA DOMANI IN FOI
FATEVELE DA SOLI.



Cap. 7

"Cunsiderasion, tranèl e speransi"

Veg

Tant voti as resta meraviglià
avghinda realisà cul ch' javu tant sperà,
pò, magari zà dop a na stmanna
tùt smantià e archivià cmè an tna tanna;
lavu, sacrificissi e impegn senza ninni cunsiderasion
ma lasomsi nent pià da la disperasion
peichè za dadman anviaromma n'ater lavù
as feimomma mai, guai a daj d'ascut al testi ad rù;
spauventomsi nent trop du limbu dla memoria
quaica faiuala la restarrà ben per la storia.

Fiò

Ai pajs bela pian semp a l'avansa
nui a tnomma sut cuntròl la balansa
a seicomma ad serni la dose giusta
la cunision l'è sutta na bonna susta;
i nost calendari i son pin ad scadensi
e se a l'urisont avgomma nivuli densi
as lasomma mai pià da quaic spauvent
a somma anchesi cme scansà i brit aveniment
e se po quaicdin u smenna zizannia
allu scrubomma cmè duvi svartià na mannia.

Fija

Avij nent paura ad quaic mes fali
gira e rigira a j'armarran beja sciufli
cul sò bucinadi as truvarran an mes a la nitta
acsi per la veigogna a l'is ai mitarran la bitta;
i faran pò l'eremitta per quaic meis
e cmè i gat anvijbi i terran i cavij teis
e s'at capita d'ancrusiaj per la strà
cul braji pinni i rischii ad bati na trunà.

Giuvnot

Nui a somma nent custimà agl'isibision
andomma nent an primma fila per ciapà uvasion
as limitomma ad fruntegià al circustansi
poichi paroli e senza tanti sfransi;
cuncretessa, lavù e pitost dl'impègn
lasanda adrè fjbissij da trop malègn
a rasumomma cun j'acer cmè risolti i prublema
acsi a schiviomma strafì e anatema.



*Fanciot piev nent gena
per Carvà jè nin c'av tena.*



Cap. 8
**"A spicianda che la lin-na
 s'arnova"**

Veg

ist brit invern a ma fac vegghi i slòn
 cunsimà ciabot e bagliessi per liberas dai giasòn
 anciudà an cà per l'ultim di dl'ani
 quasi stuf ad vegghi pasà dal befani;
 per nov meis a jomma digeri dal manòvri
 e cun tit al sacoci semp pi pòvri
 a jè mancà la voja ad seicà an tu l'infarnòt
 assomma cuntentà cun na gasos per fà ai bòt.
 Au 97 a somma rivà caria ad tanti speransi
 auomma pudì serni senza fristà tant balansi
 speromma sulament ad pudì tirà anan
 a spicianda ad cambià tic icc turtrulan.



Fiò

Vist che la super la custa ormai cmè la grapa
 a favur dl'Avucàt a jan tacà na bela ciapa,
 am pussu a crumpà la machina cun in bel schint
 ma ajan aumentà i medicinal per fà quadrà i chint;
 an tu stupin as-lu ciaparran la povra gent
 e j'afarista j'avran semp u supravent;
 per n'atr'ani i mitarran ai bul an s'al biciclètti
 e i dirit d'autur a-ju pagarran anches al suètti,
 pò, se per cas at ven an pò 'd sfuria
 cun la tasa di scaric ai partafoi a s'anfuria,
 speromma che ai sparissa sa manica ad tont
 sidnò am faran pagà dasi per vegghi u tramont.

Fija

a somma stufi ad digeri carota e bastòn
 e ad ramlà tit u di ramarinni e strason,
 per mettì si cà ai vè in tern au lot
 e ancor pi grisa l'è pudì trovà in giuvnot;
 auomma nent fas manteni per l'eternità
 o spicià in lavù quasi per pietà,

doni e fiji domsi da fà cun sulersia
 sfomsi d'is camuli cun na bela pertia
 la ciav du lichec a l'omma nui an cunsegn-gna
 per andà anan a jomma anchesi na muscla guregn-gna.

Giuvnot

stà giornà la vè ormai anvers la fin
 av salutomma primma che u sija amli brin
 a'vomma chintà listorji e quaica verità
 speromma che n'aplausu as lu siju merità;
 per la Sucieta as-somma ampegnà cun tant calur
 peichej, se tic ansema, ai pais aj fomma unur!



*Sunei e avij nent poua c'av vena i sidur
 lasei in ricord cmè per i quader d'in bon pitùr!*

Cap. 9
**"Antant che av
 salutomma..."**

Veg

Se ben nent ticc a jan voja ad scariulà
 a somma chi listes per sarà ist Carvè,
 ma andei pian a trà si dei vin brulé
 sid-nò per andà a cà a trovi pi u santé;
 ades,peichej a jan scuert al virtù dai vin e dl'i-ua
 chi cuntrastu malatiji che ad speransi at nu resta
 [pi na spli-ua
 u sarà nent mei arpiantà topij e duppi filagn
 listrà al canvi e i vaslòt da mettij turna a bagn?
 ma tnij dament cul provejbi cal vè mai a fin:
 " doni e vin laseiji mai a cà 'd nin!

Fija

nui a fomma nent i saldi ad fin stagion
 tit l'ani as la tnomma a sut presion,
 au 117 a jomma nent d'ambogn ad segnalà
 cul ca ma specia a l'omma senza tant ramlà,
 se po as trovomma di biet d'luterij an pò anturtiaji
 aj tromma nent ant'agl'urtiji ma a tiromma fòra ongi
 [e tnaji;
 nanc a jomma di brit ambogn ad sfugas
 a tiranda preji o dai cavalcavija lancià di mas
 a is testi disgrasiati senza fiddich e cunision
 ambogna pistaj al man e pò an parson cun
 [mesa rasion.

Veg

per manteni la tradision dai Carvè
 e speranda ad lasav in ricord da preservà,
 crumpei in librèt cun stà puisija
 e ogni tant alsilla an famijia
 auomma amma chi supraviva stà tradision
 e che ù nost dialèt cal vaga nent an perdision;
 ù dui milla l'è nent tant luntan
 per icc fanciot cu sija n'impegn za da-dman
 auomma nent che a s'iju nui a pasà a la storia
 l'è pitost in duver dai pais ad cunservà la memoria.

**AV SALUT TICC E GARDEI AD STA' ARDI'
 TICC PER N'ATR'ANI CA SIJU TORNA AC-SI-CHI'!!**

CIAU, ARVEDSI ANCORA!



*Domma urchestral, sbanatei icc strument
 per Carvè a somma mai cuntent!*

